



Inatsisartunut ilaasortaq Naaja H. Nathanielsen, IA

MAANI

Aatsitassanut ikummatissanullu inatsimmi § 4, imm. 3 aamma London Mining Greenland A/S-ip Genel Nice Development Ltd.-imut tunniunneqarnera pillugu § 37 naapertorlugu apeqqummut nr. 2015-006-imut akissuteqaat

27-01-2015
Sags nr. 2015-110245
Dok. nr.

1) Naalakkersuisut isumaqarpat Aatsitassat pillugit Inatsimmi § 4, imm. 3 naapertorlugu aalajangiisoqarsimasoq, decembarip 21-anni London Mining A/S-ip pigineqarnerata allannguutaa akuerineqarmat? Akissut tunngavilersoqquneqarpoq.

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: bmp@nanoq.gl
www.nanoq.gl

Akissut:

London Mining Greenland (1) (Jersey) Limited-imi piginneqatigiit aningaasaliissutaat (aktiekapitali) tamaat London Mining Plc-imit General Nice Development Limited-imut tunniunneqarnerisigut, pīaanissamut akuersissutip 2013/31-ip toqqaannangitsumik tunniunneqarnissaa ulloq 21. decembari 2014 Naalakkersuisut akueraat. London Mining Greenland (2) (Jersey) Limited-imi, London Mining Greenland A/S-imi piginneqatigiit aningaasaliissutaat (aktiekapitali) tamaginnik piginnittuusumi, piginneqatigiit aningaasaliissutaat (aktiekapitali) tamaasa London Mining Greenland (1) (Jersey) Limited-ip pigisarai. London Mining Greenland A/S pīaanissamut akuersissut 2013/31 malillugu pisinnaatitsissummik piginnittuuvoq.

Naalakkersuisut pīaanissamut akuersissummik toqqaannangitsumik tunniussinermik taamaattumik akuersissuteqarnissamut aalajangiinerat, akuersissutip tunniunneqarneranut imaluunniit atugassarititaasut pillugit aalajangiinerunngilaq, ilanngullugu inuiaqatigiinni pissutsinut imaluunniit avatangiisini pissutsinut tunngatillugu pissutsit pillugu akuersissummi atugassarititaasut pillugit aamma aalajangiinerunani. Akuersissutip toqqaannangitsumik tunniunneqarnissaata taamaattup akuersissuteqarfigineqarnissaanut aalajangiinermi, Naalakkersuisut taamaalillutik akuersissummi atugassarititaasut allanngortissinnaanngilaat imaluunniit inuiaqatigiinni pissutsinut imaluunniit avatangiisini pissutsinut tunngatillugu pissutsit pillugit atugassarititaasunik nutaanik aalajangersaasinnaanatik. Kisiannili pisinnaatitsissummik pigisaqartup ingerlatseqatigiiffiup tunniussinerup kingorna pisinnaatitsissummik pigisaqartumut piumasaqaatit, ilanngullugit pisinnaatitsissummik pigisaqartup sulianut paasisimasaqarneranut (sulianut piginnaasaqarneq) aamma aningaasaqarnikkut pissutsinut (aningaasaqarnikkut piginnaasaqarneq) tunngatillugu piumasaqaatit,

naammassisinnaaginnassappagit, Naalakkersuisut toqqaannangitsumik tunniussineq taamaattoq nalinginnaasumik akuersissuteqarfigisussaavaat.

Piaanissamut akuersissummik toqqaannangitsumik tunniussinerup taamaattup akuersissuteqarfigineqarnissaa pillugu aalajangiineq taamaalilluni, pissutsit inuiaqatigiinnut imaluunniit avatangiisinut annertuumik sunniuteqarsinnaasut pillugit imminermini aalajangiinerunngilaq. Taamaalilluni aamma toqqaannangitsumik tunniussinermut akuersissuteqarnissaq pillugu aalajangiineq, § 4, imm. 3 malillugu aalajangiinerunngilaq, Naalakkersuisut aalajangiinnginneranni Inatsisartuni ataatsimiititaliamut ilisimatitsissuteqarfigineqartussaq.

Aamma apeqqummut 3-imut akissuteqaat innersuussutigineqarpoq.

2) Naalakkersuisut isumaqarpat piginnittuunerup allanngornera pillugu paasisstissaq Inatsisartunut apuunneqarnissaa pisariaqartoq?

Akissut:

Apeqqummut 1-imut akissuteqaammi oqaatigineqartut, akuersissutip 2013/31-ip toqqaannangitsumik tunniunneqarnissaata akuersissuteqarfigineqarnissaa pillugu aalajangiineq, § 4, imm. 3 malillugu aalajangiinerunngilaq, Naalakkersuisut aalajangiinnginneranni Inatsisartuni ataatsimiititaliamut ilisimatitsissuteqarfigineqartussaq.

Naalakkersuisut taamaalillutik akuersissutip 2013/31-ip toqqaannangitsumik tunniunneqarnissaata akuersissuteqarfigineqarnissaanut tunngatillugu, Naalakkersuisut aalajangiinissaat sioqqullugu aalajangiineq pillugu Inatsisartuni ataatsimiititaliamut ilisimatitsissuteqarnissamik inatsisitigut pisussaaffeqanngillat.

3) Naalakkersuisut isumaat naapertorlugu pissutsit suut Aatsitassat pillugit Inatsisip § 4, imm. 3-anni pineqarpat? Naalakkersuisut isumaat naapertorlugu pissutsit qanoq ittut pillugit aalajangiisoqartinnagu Inatsisartut ilisimatineqartarnissaat pillugu assersuusiortoqarnissaa kissaatigineqarpoq.

Akissut:

Aatsitassanut ikummatissanullu inatsimmi § 4, imm. 3, Aatsitassat pillugit ingerlatallu tamatumunnga pingaarutillit pillugit Inatsisartut inatsisaata nr. 7, 7. decembari 2009-meersup allannguuteqartinnissaa pillugu Inatsisartut inatsisissaat nr. 26, 18. decembari 2012-meersup (aatsitassanut ikummatissanullu inatsit) atuutilernerani, inatsimmi ilanngunneqarpoq. Aatsitassanut ikummatissanullu inatsimmi § 4, imm. 3, allannguutissatut inatsisissamut inatsisissatut siunnersuutaaqqaartumi 2012-meersumi

ilaatinneqanngilaq. Taamaattoq inatsisissatut siunnersuutip siullermeerlugu oqaluuserinnineq kingorna § 4, imm. 3, Naalakkersuisut inatsisissatut siunnersuummut allannguutissatut siunnersuutaanni ilanngunneqarpoq. Naalakkersuisut allannguutissatut siunnersuutaat, Inuussutissarsiornermut Ataatsimiititaliap inatsisissatut siunnersuutip aappassaaneernejarnissaanut isumaliutissiissumminik suliaqarnerminut atatillugu imatut apeqquteqarnera tunngavigalugu suliarineqarpoq: UKA2011/50-ip ataani apeqquteqaat aallaavigalugu oqallinnermut Naalakkersuisut akissuteqaataanni oqaaseqaatit naapertorlugit, piiaanissamut akuersissutit Inuussutissarsiornermut Ataatsimiititaliamut oqaaseqarfigineqartussanngorlugit saqqummiuttassallugit Naalakkersuisut eqqarsarpat? Naalakkersuisut akippit: Inuussutissarsiornermut Ataatsimiititaliami siunnersuut taamaattoq tapersernejarsinnaappat, piiaanissamut akuersissutit aamma ikummatissiassanut tunngatillugu neqerooruteqartitsinermi , Naalakkersuisut aalajangiinissaat sioqqullugu Inatsisartuni ataatsimiititaliamut oqaaseqarfigineqartussanngorlugit saqqummiunneqartarnissaat pillugu allannguutissatut siunnersuummik saqqummiussinissamut Naalakkersuisut piareersimapput. Inuussutissarsiornermut Ataatsimiititaliap siunnersuutip aappassaaneernejarnissaanut isumaliutissiissutaani ataatsimiititaliap Naalakkersuisut akissuteqaataat tusaatissatut tiguaat. Ingerlatassat pillugit suliat inuiaqatigiinnut imaluunniit avatangiisinut annertuumik sunniuteqarsinnaasut, Naalakkersuisut suliani aalajangiinissaat sioqqullugu, Inatsisartuni ataatsimiititaliamut attuumassuteqartumut ilisimatitsissutitut nassiunneqartassasut kissaatigalugu Ataatsimiititaliap oqaatigaa. Tamanna tunngavigalugu § 4, imm. 3, Naalakkersuisut inatsisissatut siunnersuummut allannguutissatut siunnersuutaanni ilanngunneqarpoq. Allannguutissatut siunnersuut taamaattoq inatsimmi aalajangersakkanut siunnersuummut nassuiaatitaqanngilaq. Taamaattumik § 4, imm. 3-imut inatsisissatut siunnersuummut nassuiaatinik, maleruagassap nassuiarneqarnerani aammalu suliaqarnermi atornejarnerani atornejarsinnaasunik, nassaassaqanngilaq.

Naalakkersuisut naliliinerat malillugu § 4, imm. 3 imatut nassuiarneqartariaqarpoq, Naalakkersuisut piiaanissamut akuersissummik tunniussinissaq aamma ikummatissiassarsiorluni misissuinissamut qalluinissamullu akuersissutinut tunngatillugu neqeroortitsinerit aamma matu ammasumik taagorneqartut suleriaatsit akuersissuteqarnissaq sioqqullugit Naalakkersuisut Inatsisartuni ataatsimiititaliaq attuumassuteqartoq ilisimatittassagaa. Tamatuma saniatigut taamatut ilisimatitsissuteqartoqartassaaq, pissutsit annertuumik inuiaqatigiinnut imaluunniit avatangiisinut sunniuteqarsinnaasut pillugit suliassat allat pillugit Naalakkersuisut aalajangiinissaat sioqqullugu. Suliassamut aalajangersimasumut tunngatillugu taamaattoqassanersoq, aalajangersimasuni aammalu pissutsit attuumassuteqartut tamaasa tunngavigalugit aalajangiiffigineqartariaqarpoq. Taamatut aalajangiinermi ilaatigut maannamut Inatsisartuni ataatsimiititaliamut § 4, imm. 3 malillugu Naalakkersuisut ilisimatitsissuteqartarnermut suleriaasiat pingaartinneqartariaqarpoq.

Suliassanut Naalakkersuisut aalajangiinissaat sioqqullugu, Naalakkersuisut Inatsisartuni ataatsimiititaliamut ilisimatitsissuteqarfigisassaannut assersuutitut taaneqarsinnaapput:

- (1) Suliaq aatsitassanik imaluunniit ikummatissiassanik piiaanissamut akuersissummik tunnuissinissamut tunngasoq.
- (2) Suliassaq ikummatissiassarsiorluni misissuinissamut qalluinissamullu akuersissutinut tunngatillugu neqeroortitsinermik imaluunniit matu ammaassisumik taagorneqartumi suleriaatsimik akuersissuteqarfigineqartussamut tunngasoq.

Matuma siuliani taaneqartunut nangissutigalugu paasissutissiissutigineqarsinnaavoq Inatsisartut Aatsitassanut Ataatsimiititaliaanut ilisimatitsissutinik makkuningga Naalakkersuisut nassiussisimmata.

6. juuni 2013: "London Mining pillugu Aatsitassanut Ataatsimiititaliamut ilisimatitsissut.

21. oktobari 2013: "London Mining-ip qinnuteqaataa pillugu Aatsitassanut Ataatsimiititaliamut ilisimatitsissut" (Isertuussassatut naqissusigaasoq)

25. februaari 2014: "True North Gem Inc.-ip Qeqertarsuatsiaat eqqaanni rubinik, safirinik aappilarujuttunik allanillu korundinik aappaluttunik, aappalorujuttunik, aappilarujuttunik, aappaluartunik tunguusanik, qaqortunik imaluunniit qaqorujuttunik piiaanissamut qinnuteqaataa pillugu Aatsitassanut Ataatsimiititaliamut ilisimatitsissut" (Isertuussassatut naqissusigaasoq)

24. maaji 2014: "True North Gems (TNG)-ip sumiiffimmi Aappaluttumi Qeqertarsuatsiaat eqqaaniittumi akuersissutip nr. 2014/21-ip ataani aatsitassanik piiaanissamut piiaanermut pilersaarutaata aamma matusinissamut pilersaarutaata akuersissuteqarfigineqarnera, kiisalu Benefit Impact Agreement (IBA) pillugit Aatsitassanut Ataatsimiititaliamut ilisimatitsissut" (Isertuussassatut naqissusigaasoq)

30. maaji 2014: "Zinkregion Kalaallit Nunaata avannaani aatsitassanut misissuinissamut ammaanneqanissaa pillugu Inatsisartuni aatsitassanut ikummatissanullu ataatsimiititaliamut ilisimasitsissut."

7. juuli 2014: "Ikummatissiassanik misissuinissamut qalluinissamullu akuersissutinik neqeroortitsineq pillugu Inatsisartut Aatsitassanut ataatsimiititaliaanut ilisimatitsissut."

Inussiarnersumik inuulluaqqusillunga



Andreas René Uldum

Aningaasaqarnermut Aatsitassanullu Naalakkersuisoq